

tanto sia scritto a li rectori de Padoa, debbano far ruinar el muro che stropia la via, et levar ogni impedimento et far far uno ponte de legno dove è el ponte de piera, et aldino quei dal Lion et fazino justitia *ut in parte*. Fu presa. 118, 8, 36.

Fu poi leto una suplication de uno Zuani Seginti da Cataro saliner, et posto per li Consieri, Cai di XL et tutti i Savi, che atento el dito Zuan Seginti habbi servito per saliner nel loco de Risan, con salario lire 7 soldi 10 al mexe, per tanto a Nicolò suo fiol, al qual per sier Domenego Gritti olim rector li fo concesso dito officio da poi la morte dil padre, per tanto li sia cressuto, si che l' habbi ducati 2 al mexe corenti, con questo che li sali se vendino debbasi vender a sue spexe, *ut in parte*, la qual vol i tre quarti. Ave: 146, 10, 21.

301 *Di Franza, dil Renier orator, di 22 Fevrer 1531, ricevute a di 15 Marzo.* Come da poi le ultime ha inteso el nontio pontificio, qual ha negociato con la Christianissima Maestà per il matrimonio de la duchesina nel duca de Orliens, el re li ha dito che venendo Cesare in Italia voria el Pontefice se abochasse con Soa Maestà et veder di obtenir da lui la superiorità de la Franza o liberarlo da la rinuntia fata dil stato de Milan, overo la remission dil debito, questa Maestà li dia dar per la capitulation, et questo è stà dito per impedir el star de Cesare in Italia et non tratti col Pontefice altra cosa. Scrive quel domino Sisto Zucolo, che vene per nome dil Papa, venuto l' abate di Negri, per far restar el Triulzi, et questo Sisto tornar a Roma, ma non havendo portà la licentia in scrittura restoe, hora mo è partito et torna a Roma. È già anni do che 'l marchese Loyse . . . di Saluzo vene de qui, et li fo dato infamia coptra questa corona et la madre l' acusoe et fo condanà per questa Maestà di felonìa di esser caduto dil feudo, si apelò al parlamento, et la madre tolse la sua protetione et con danari non li mancò, ma la sententia è stà laudata, *unde* questa Maestà ha dato dito marchesato a Francesco monsignor suo fratello, et quello ampliato de privilegi, et fra pochi zorni partirà per Saluzo. Scrive de qui si ha hauto le nove di le preparation fa el turco da mar et da terra per Italia, per lettere di 28 zener da Venezia, et di Roma di 7 de l' instante. Questa Maestà ha fa to butar in questo fiume sopra la Sena over Sequaro in aqua un galion di bote 200, vuoga remi 40 per banda a do remi per banco, et lo vol far navigar fino a la foze dil mare, sul qual andará Soa Maestà fino a Santa Maria de Albe a veder una grossa sua nave,

la qual si fa già più anni de smisurata grandezza, tale che se stima dover esser inavigabile; poi Soa Maestà se dice andará per la bassa in Normandia, et se troverà li a far la Pasqua, et vol andar in Bertagna, contra la opinion de tutta questa corte, la qual aborrisse la Bertagna come l' inferno.

*Di Ingaltera, dil Capello orator, da Londra, di 3 Fevrer.* Come le noze di la principessa nel duca di Orliens par se vagi perlongando, perchè monsignor de Visestre non è venuto, et si aspetava, et tanto più se diferirà a far de qui lo parlamento; et par che 'l re Christianissimo, dovendo investir el fiol duca de Orliens di certo Stato, se scusa non lo poter far se non con el parlamento per esser in danno dil signor Dolfin et diminution dil stato dil regno di Franza, per tanto il far di le noze è perlongato. È zonto mò terzo zorno qui domino Andrea Cusoni homo dil re Zuanne, vol favor de questa Maestà a far la pace con re Ferandino et scusarsi di la intelligentia ha con el Signor turco, et è stato in Franza et a Roma, et voria pace per anni 20, *saltem* trieva per anni 3, et che 'l suo re vol haver tutto el regno de Hongaria. Eri sera ave lettere dil capitano di le galie nostre, è in Antona, qual manda incluse, et non è il tempo fo scritto come per quelle si vederà, pregandomi vedesse con questa Maestà far castigar quei tristi galioti hanno fatto tal insulto, *unde* andai dal re, era con lui l' orator di Franza mi mandò a dir, non havendo lettere di Venetia, parlasse col duca di Norfolch. Li feci intendere la importantia per proveder etc.; fè ordinar al dito duca facesse il tutto, et cussi fui con Sua Signoria el qual ordinò lettere al Met dovesse dar ogni aiuto al capitano, et non bastando le zente di Antona, tolesse di vilazi de fuora. Scrive de qui sono avisi di le cose et preparation dil Turco per Italia da ogni banda et per via de Franza.

*Di Antona, di sier Filippo Basadonna capitano di le galie nostre, scritte a l' orator Capello a Londra.* Scrive come non havendo voluto li galioti tuor le do page, come è el costituito et have ordine per lettere di la Signoria nostra, volendo caricar le galie niun volse venir a galia, *unde* li patroni se doleano de questo; et havendoli fato dar el pan fino a di 27 zener, a instantia de patroni fece far una proelama, che fra termine de zorni 2 venisseno a tuor le loro 2 page con le bandiere spiegate come se costuma, che più ditti galioti non habbino el pan, per il che hessendo andato questa matina con l' armirao et ufficiali a messa a Santa Maria, in regresso di la chiesa de